

**USVOJENI DNEVNI RED 6. TEMATSKE SJEDNICE GRADSKOG VIJEĆA TUZLA,
ODRŽANE 3.9.2026. GODINE
(broj: 01/04-A-13498-2026)**

1. Rasprava o Rješenju Kantonalne uprave za inspekcijske poslove Tuzlanskog kantona kojim se privremeno zabranjuje JU “Dom penzionera” Tuzla obavljanje djelatnosti socijalne zaštite do ispunjavanja propisanih uslova i o aktuelnom stanju u Domu penzionera Tuzla

**Bosna i Hercegovina
Federacija Bosne i Hercegovine
Tuzlanski kanton
GRAD TUZLA
GRADSKO VIJEĆE**



**Broj: 01/04-A-13498-2026
Tuzla, 3.9.2026. godine**

**FEDERALNO MINISTARSTVO RADA I SOCIJALNE POLITIKE
VLADA TUZLANSKOG KANTONA
MINISTARSTVO ZA RAD, SOCIJALNU POLITIKU I POVRATAK TUZLANSKOG KANTONA
KANTONALNA UPRAVA ZA INSPEKCIJSKE POSLOVE TUZLANSKOG KANTONA
JU „DOM PENZIONERA“ TUZLA**

- direktorici
- Upravnom odboru

GRAD TUZLA

- Gradonačelnik Grada Tuzle dr.sc. Zijad Lugavić
- Sekretar organa državne službe
- Stručna služba Gradskog vijeća
- Služba za ekonomski razvoj, poduzetništvo i poljoprivredu

PREDMET: Obavijest

Na šestoj tematskoj sjednici Gradskog vijeća Tuzla, održanoj 3.9.2026. godine, pod tačkom **1.** Rasprava o Rješenju Kantonalne uprave za inspekcijske poslove Tuzlanskog kantona kojim se privremeno zabranjuje JU „Dom penzionera“ Tuzla obavljanje djelatnosti socijalne zaštite do ispunjavanja propisanih uslova i o aktuelnom stanju u Domu penzionera Tuzla, usvojeni su sljedeći

ZAKLJUČCI

1. Gradsko vijeće Tuzla, primjenjujući i uvažavajući načelo prioriteta i načelo savjesnosti, naglašava da sve aktivnosti koje je ovo Gradsko vijeće (uključujući i Kolegij Gradskog vijeća) poduzimalo kao i sve zaključke koje je donosilo, donosilo je u cilju zaštite života, zdravlja i poboljšanja uslova boravka korisnika Doma penzionera i isključivo je radilo i djelovalo u dobroj vjeri i sa dobrim namjerama.
2. Gradsko vijeće Tuzla konstatuje da je Rješenjem Kantonalne uprave za inspekcijske poslove Tuzlanskog kantona, broj: 17/4-IV-31-006673/26 od 17.08.2026. godine JU „Dom penzionera“ Tuzla privremeno zabranjeno obavljanje djelatnosti socijalne zaštite do ispunjavanja propisanih uslova te da zabrana počinje teći od dana uručenja Rješenja a da žalba ne odlaže njegovo izvršenje.
3. Gradsko vijeće Tuzla smatra da je potrebno hitno poduzeti sve zakonom dopuštene mjere kako bi se otklonili utvrđeni nedostaci i što prije stekli uslovi za nastavak rada JU „Dom penzionera“ Tuzla, uz istovremeno osiguravanje kontinuiranog smještaja, njege i zaštite postojećih korisnika Doma.
4. Gradsko vijeće Tuzla traži od Ministarstva za rad, socijalnu politiku i povratak Tuzlanskog kantona da, zbog izuzetne hitnosti i posljedica koje zabrana rada proizvodi prema postojećim korisnicima Doma, bez

odlaganja i prioritarno odluči o žalbi JU „Dom penzionera“ Tuzla podnesenoj protiv Rješenja Kantonalne uprave za inspeksijske poslove (žalba je, prema dostavljenoj dokumentaciji, podnesena 24.08.2026. godine).

5. Gradsko vijeće Tuzla traži od Ministarstva za rad, socijalnu politiku i povratak Tuzlanskog kantona da prilikom odlučivanja po žalbi razmotri sve zakonom dopuštene mogućnosti da se JU „Dom penzionera“ Tuzla omogući otklanjanje utvrđenih nedostataka u konkretnim i objektivno ostvarivim rokovima, uz odgovarajući nadzor njihovog otklanjanja.

6. Gradsko vijeće Tuzla smatra da se prilikom određivanja rokova za otklanjanje nedostataka mora voditi računa o prirodi svakog pojedinačnog nedostatka i objektivnom vremenu potrebnom za njegovo otklanjanje, naročito kada su u pitanju nabavka i ugradnja liftova, građevinski i tehnički radovi, provođenje postupaka javnih nabavki i pribavljanje potrebne dokumentacije. Aktivnosti u vezi sa nabavkom i ugradnjom liftova već su pokrenute.

7. Gradsko vijeće Tuzla traži od Vlade Tuzlanskog kantona, Ministarstva za rad, socijalnu politiku i povratak Tuzlanskog kantona i Kantonalne uprave za inspeksijske poslove Tuzlanskog kantona da, svako u okviru svojih zakonskih nadležnosti, predmet JU „Dom penzionera“ Tuzla tretiraju sa ciljem što hitnijeg otklanjanja nedostataka i stvaranja uslova za zakonito obavljanje djelatnosti, uz punu zaštitu postojećih korisnika Doma.

8. Gradsko vijeće Tuzla posebno ukazuje na to da se u JU „Dom penzionera“ Tuzla nalazi više od 100 korisnika kojima je potrebno kontinuirano osiguravati smještaj, ishranu, njegu, lijekove, terapiju, zdravstvenu zaštitu i druge neophodne usluge, te da se pri provođenju svake mjere mora voditi računa o njihovom životu, zdravlju, sigurnosti i dostojanstvu.

9. Gradsko vijeće Tuzla traži od Ministarstva za rad, socijalnu politiku i povratak Tuzlanskog kantona i Kantonalne uprave za inspeksijske poslove Tuzlanskog kantona da, u okviru svojih nadležnosti, daju jasno pisano izjašnjenje o načinu postupanja prema postojećim korisnicima tokom trajanja privremene zabrane rada, posebno u pogledu pružanja neophodne njege, ishrane, terapije, zdravstvene zaštite i drugih usluga bez kojih bi njihovo zdravlje i sigurnost mogli biti ugroženi.

10. Ukoliko nadležni kantonalni organi smatraju da izvršenje Rješenja podrazumijeva izmještanje postojećih korisnika iz JU „Dom penzionera“ Tuzla, Gradsko vijeće Tuzla traži da se prethodno dostavi konkretan i provediv operativni plan zbrinjavanja svih korisnika, sa podacima o raspoloživim ustanovama i kapacitetima, načinu transporta, nastavku terapije i zdravstvene njege, ishrani, troškovima i institucijama odgovornim za njihovo zbrinjavanje.

11. Gradsko vijeće Tuzla smatra da se nijedno rješenje nastale situacije ne može zasnivati na tome da više od 100 postojećih korisnika ostane bez odgovarajućeg smještaja, njege i zaštite.

12. Gradsko vijeće Tuzla podržava nastavak svih aktivnosti JU „Dom penzionera“ Tuzla i Grada Tuzle usmjerenih na otklanjanje utvrđenih nedostataka i stvaranje uslova za ponovno zakonito obavljanje djelatnosti.

13. Zadužuju se nadležne gradske službe i JU „Dom penzionera“ Tuzla da sačine operativni pregled svih utvrđenih nedostataka, sa podacima o tome:

- koji su nedostaci već otklonjeni;
- koje aktivnosti su u toku;
- koji se nedostaci mogu otkloniti odmah ili u kratkom roku;
- koji zahtijevaju složenije tehničke, administrativne ili investicione postupke;
- koja sredstva su potrebna; i
- koji je objektivno najkraći rok za realizaciju svake pojedinačne aktivnosti.

14. Gradsko vijeće Tuzla traži da se svi nedostaci koji se mogu otkloniti odmah ili u kratkom roku, otklanjaju bez čekanja na završetak složenijih investicionih i infrastrukturnih zahvata.

15. Grad Tuzla će, kao osnivač JU „Dom penzionera“ Tuzla, u okviru svojih zakonskih i budžetskih mogućnosti, nastaviti pružati potrebnu finansijsku, tehničku, administrativnu i organizacionu podršku radi što bržeg ispunjavanja propisanih uslova.

16. Nabavka i ugradnja potrebnih liftova, kao i drugi građevinski, tehnički i infrastrukturni radovi neposredno povezani sa ispunjavanjem propisanih uslova za rad JU „Dom penzionera“ Tuzla, tretirat će se kao prioritetne aktivnosti, uz provođenje svih potrebnih postupaka u najkraćim zakonom dopuštenim rokovima.

17. Gradsko vijeće Tuzla traži od Kantonalne uprave za inspekcijske poslove Tuzlanskog kantona da, u okviru svojih zakonskih ovlaštenja, nakon što JU „Dom penzionera“ Tuzla prijavi otklanjanje pojedinog nedostatka, bez nepotrebnog odlaganja izvrši odgovarajući kontrolni inspekcijski pregled, kako bi se odmah utvrdilo ispunjavanje pojedinačnih uslova i omogućilo što brže prestajanje razloga na kojima se zasniva privremena zabrana.

18. Gradsko vijeće Tuzla upućuje inicijativu Ministarstvu za rad, socijalnu politiku i povratak Tuzlanskog kantona za izmjene i dopune Pravilnika o uslovima, načinu i postupku utvrđivanja ispunjavanja uslova za obavljanje djelatnosti socijalne zaštite, posebno u dijelu kojim je propisano da u jednom objektu ne može biti smješteno više od 100 korisnika. Gradsko vijeće Tuzla podržava Inicijativu JU „Dom penzionera“ Tuzla u kojoj se ukazuje na to da ova Ustanova raspolaže objektom sa više od 10.000 m² korisne površine, devet spratova i 147 soba, te predlaže da se kapacitet ne određuje samo apsolutnim brojem korisnika nego i prema stvarnim prostornim i drugim uslovima.

19. Gradsko vijeće Tuzla predlaže Ministarstvu za rad, socijalnu politiku i povratak Tuzlanskog kantona da prilikom razmatranja izmjena Pravilnika posebno ispita mogućnost da se kapacitet ustanova utvrđuje prema objektivnim i mjerljivim kriterijima, kao što su raspoloživa i funkcionalna površina, površina po korisniku, projektovani kapacitet, struktura korisnika, kadrovski normativi, sanitarni, zdravstveni, protivpožarni, sigurnosni i drugi propisani standardi.

20. Gradsko vijeće Tuzla smatra opravdanim da se prilikom eventualnih izmjena Pravilnika posebno razmotri položaj postojećih objekata većeg kapaciteta, pod uslovom da su za veći broj korisnika osigurani svi propisani prostorni, kadrovski, zdravstveni, sigurnosni i drugi uslovi.

21. Gradsko vijeće Tuzla traži da se bez odlaganja održi zajednički radni sastanak predstavnika Ministarstva za rad, socijalnu politiku i povratak Tuzlanskog kantona, Kantonalne uprave za inspekcijske poslove Tuzlanskog kantona, Grada Tuzla i JU „Dom penzionera“ Tuzla, uz učešće drugih nadležnih institucija prema potrebi, sa ciljem utvrđivanja konkretnog i zajedničkog plana za otklanjanje razloga zbog kojih je izrečena privremena zabrana rada.

22. Rezultat zajedničkog sastanka treba biti konkretan pregled mjera i rokova, sa jasno utvrđenim aktivnostima potrebnim za ispunjavanje svakog preostalog uslova i stvaranje pretpostavki za nastavak zakonitog rada JU „Dom penzionera“ Tuzla.

23. Gradsko vijeće Tuzla traži od JU „Dom penzionera“ Tuzla i nadležne gradske službe da Gradsko vijeće redovno informišu o realizaciji ovih zaključaka, otklonjenim nedostacima, aktivnostima koje su u toku i očekivanim rokovima za potpuno ispunjavanje propisanih uslova.

24. Gradsko vijeće Tuzla poziva sve nadležne organe i institucije da ovom pitanju pristupe koordinirano i sa ciljem pronalaženja zakonitog, provedivog i humanog rješenja, kako bi JU „Dom penzionera“ Tuzla u najkraćem objektivno mogućem roku ispunila propisane uslove i nastavila zakonito obavljanje djelatnosti, uz punu zaštitu postojećih korisnika.

25. Ovi zaključci dostavit će se Federalnom ministarstvu rada i socijalne politike, Vladi Tuzlanskog kantona Ministarstvu za rad, socijalnu politiku i povratak Tuzlanskog kantona, Kantonalnoj upravi za inspekcijske poslove, Gradonačelniku Grada Tuzle, nadležnim službama Grada Tuzla, JU „Dom penzionera“ Tuzla i drugim nadležnim institucijama radi postupanja u okviru njihovih nadležnosti.

26. Traži se od JU „Dom penzionera“ Tuzla da bez odlaganja nastavi otklanjanje svih organizacionih, kadrovskih, tehničkih i administrativnih nedostataka utvrđenih zapisnikom nadležne komisije te da Gradskom vijeću dostavi pregled po principu: utvrđeni nedostatak - poduzeta mjera - trenutno stanje - dokaz o otklanjanju - rok za završetak.

27. Zadužuje se nadležna gradska služba da, nakon dostavljanja pregleda kadrovskih potreba i procjene troškova, zajedno sa menadžmentom JU „Dom penzionera“ Tuzla pripremi prijedlog održivog načina finansiranja nedostajućeg kadra, uključujući mogućnost budžetske podrške osnivača, povećanja vlastitih prihoda Ustanove ili kombinovanog modela finansiranja.

28. Gradsko vijeće Tuzla podržava inicijativu da se kapacitet ustanova socijalne zaštite ne određuje isključivo apsolutnim brojem korisnika, nego prema objektivnim i provjerljivim kriterijima, uključujući:

- raspoloživu neto površinu po korisniku;
- projektovani i ranije odobreni kapacitet objekta;
- strukturu i stepen zavisnosti korisnika;
- propisane kadrovske normative;
- pristupačnost objekta;
- protivpožarne, tehničke, sanitarne i sigurnosne uslove.

29. Traži se od Ministarstva za rad, socijalnu politiku i povratak Tuzlanskog kantona da Gradskom vijeću Tuzla dostavi:

- stručno obrazloženje analiza i kriterija na osnovu kojih je utvrđena apsolutna granica od 100 korisnika u jednom objektu;
- obrazloženje zašto se cilj zaštite korisnika i kvaliteta usluga ne bi mogao ostvariti primjenom proporcionalnih prostornih, kadrovskih, tehničkih i sigurnosnih standarda.

S poštovanjem,

Prilog:

- Inicijativa Gradskog vijeća Tuzla Ministarstvu za rad, socijalnu politiku i povratak Tuzlanskog kantona za izmjene i dopune Pravilnika o uslovima, načinu i postupku utvrđivanja ispunjavanja uslova za obavljanje djelatnosti socijalne zaštite („Službene novine Tuzlanskog kantona“, broj 10/24)
- Inicijativa JU „Dom penzionera“ Tuzla za izmjene i dopune Pravilnika o uslovima, načinu i postupku utvrđivanja ispunjavanja uslova za obavljanje djelatnosti socijalne zaštite („Službene novine Tuzlanskog kantona“, broj 10/24)

DOSTAVITI:

10 x naslovu
1 x evidencija
1 x a/a

PREDSJEDAVAJUĆA

Ana Pejić, BA prava